

礼仪典

禮儀典第一百九十九卷

文廟祀典部彙考二

後唐

明宗長興三年敕釋奠禮皆准郊祀錄 按五代史唐本紀不載 按文獻通考長興三年國子博士蔡同文奏伏見每年春秋二仲月上丁釋奠於文宣王以兗公顏子配座以閔子騫等爲上哲排祭奠其有七十二賢圖形於四壁面前皆無酒脯自今後乞准本朝舊規文宣王四壁諸英賢畫像前面請各設一豆一爵祠饗中書帖太常禮院檢討禮例分析中者今禮院檢郊祀錄釋奠文宣王並中祠例祭以少牢其配座十哲見今行釋奠之禮伏自喪亂以來廢祭四壁英賢今准帖爲國子博士蔡同文所奏文宣王四壁諸英賢各設一豆一爵祀享當司詳郊祀錄文宣王從祀諸座各饗二實以栗黃牛脯豆二實以葵菹鹿醢蠃醢各一實以黍稷飯酒爵一禮文所設祭器無一豆一爵之儀者奉敕其文宣王周四壁英賢自此每釋奠宜准郊祀錄各陳脯醢等物以祭

後周

太祖廣順二年六月乙酉朔幸曲阜祠孔子 按五代史周本紀云云 按冊府元龜廣順二年

五月親往兗州辛未遣端明殿學士顏行往曲阜祀文宣王廟六月己酉幸曲阜謁孔子廟既畢其所奠金花銀爐十數事留於祠所以備享遂幸孔林拜孔子墓墳側有石壇是唐朝封禪廻謁孔子之壇二百餘年間絕東封之禮洙泗之上無復鑾和之音帝以武功之餘枉車致敬尊師重道不亦優乎 按文獻通考廣順二年六月以文宣王四十三代孫前曲阜縣令孔仁玉復爲曲阜縣令仍賜緋魚袋以亞聖顏淵裔孫顏涉爲曲阜縣主簿仍敕兗州修葺祠宇墓側禁樵採時車駕親征兗州初平遂幸曲阜謁孔子祠既奠將致敬左右曰仲尼人臣無致敬之禮上曰文宣百代帝王師得無拜之卽拜奠於祠前

遼

太祖神冊三年夏五月乙亥詔建孔子廟 按遼史太祖本紀云云 按宗室義宗傳義宗名倍小字圖欲太祖長子幼聰敏好學外寬內摯神冊元年立爲皇太子時太祖問侍臣曰受命之君當事天敬神有大功德者朕欲祀之何先皆以佛對太祖曰佛非中國教倍曰孔子大聖萬世所尊宜先

太祖大悅卽建孔子廟詔皇太子春秋釋奠

神冊四年秋八月丁酉謁孔子廟 按遼史太祖本紀云云

宋

太祖建隆元年幸國子監詔增修祠宇繪先聖先賢先儒之像 按宋史太祖本紀不載按禮志至聖文宣王唐開元末升爲中祠設從祀禮令攝三公行事朱梁喪亂從祀遂廢唐長慶二年仍復從祀周顯德二年別營國子監置學舍宋因增修之塑先聖亞聖十哲像畫七十二賢及先儒二十一人像於東西廡之木壁太祖親撰先聖亞聖贊十哲以下命文臣分贊之 按宋會要建隆元年二月太祖幸國子監詔加飾祠宇及塑繪先聖先賢先儒之像

建隆二年詔諸州貢舉人就國子監謁先師 按宋史太祖本紀不載 按禮志其謁先師之禮建隆二年禮院準禮部貢院移按禮閣新儀云舊儀無貢舉人謁先師之文開元二十六年詔諸州貢舉人見訖就國子監謁先師官爲開講質問疑義所司設食昭文崇文兩館學士及監內諸舉人亦準此自後諸州府貢舉人十一月朔日正衙見訖擇日謁先師遂爲常禮

建隆三年詔祭文宣王用一品禮 按宋史太祖本紀不載 按闕里志建隆三年詔祭文宣王用一品禮立十六戟於廟門仍詔用永安之曲

太宗端拱元年幸太學謁文宣王廟 按宋史太宗本紀端拱元年八月庚辰幸太學 按禮志太宗亦三謁廟詔繪三禮器物制度於國學講論堂木壁又命河南府建國子監文宣王廟

淳化四年從監庫使臣請先聖廟六衙朔望焚香 按宋史太宗本紀不載 按闕里誌云云

真宗景德三年王欽若請令諸道修葺文宣王廟 按宋史真宗本紀不載 按闕里誌景德三年資政殿大學士王欽若奏令諸道州府軍監文宣王廟摧毀處量破倉庫頭子錢修葺仍令曉示今後不得占射充磨勘司推勘院及不得令使臣官員等在廟內居住

景德四年增孔林戶二十定外州長吏釋奠禮 按宋史真宗本紀景德四年五月兗州增二十戶守孔子墳 按禮志其釋奠之禮景德四年同判太常禮院李維言按開寶通禮諸州釋奠並刺史致齋三日從祭之官齋於公館祭日刺史爲初獻上佐爲亞獻博士爲終獻今諸州長吏不親行祀非尊師重教之道詔太常禮院檢討以聞按五禮精義州縣釋奠刺史縣令初獻上佐縣丞亞獻州

博士縣主簿終獻有故以次官攝之

大中祥符元年幸曲阜謁文宣王廟加諡爲元聖文宣王追封叔梁紇爲齊國公顏氏爲魯國夫人
元官氏鄆國夫人 按宋史眞宗本紀大中祥符元年十一月戊午幸曲阜縣詣文宣王廟韡袍再
拜幸叔梁紇堂近臣分奠七十二弟子遂幸孔林加諡孔子曰元聖文宣王遣官祭以太牢給近便
十戶奉塋廟賜其家錢三十萬帛三百匹以四十六世孫聖佑爲奉禮郎近屬授官賜出身者六人
丁卯賜曲阜孔子廟經史 按禮志大中祥符元年封泰山詔以十一月一日幸曲阜備禮謁文宣
王廟內外設黃麾仗孔氏宗屬並陪位帝服韡袍行酌獻禮又幸叔梁紇堂命官分奠七十二弟子
先儒洎叔梁紇顏氏初有司定儀肅揖帝特展拜以表嚴師崇儒之意親製贊刻石廟中復幸孔林
以樹擁道降輿乘馬至文宣王墓設奠再拜詔追諡曰元聖文宣王祝文進署祭以太牢修飾祠宇
給便近十戶奉塋廟仍追封叔梁紇爲齊國公顏氏魯國夫人伯魚母元官氏鄆國夫人 按玉

海大中祥符元年十月二十七日甲寅詔曰朕以紀號岱宗觀風廣魯載懷先聖寶主斯文將申款
謁之儀用表欽崇之志宜取十一月朔幸曲阜縣備禮躬謁仍付所司詳定所言車駕謁文宣王廟

內外設黃麾仗襲文宣公伯叔兄弟並許陪位從之十一月一日幸曲阜謁文宣王廟禮畢於殿西序召見孔氏子孫撫諭問宣尼墳塋所在令子孫前至孔林以林木擁道降輿乘馬至墓設奠再拜問東及南二塚子孫對曰東伯魚南子思退坐北序與從臣閣碑板詔追諡曰元聖文宣王 按續文獻通考大中祥符元年十一月制曰王者順考古道懋建大猷崇四術以化民昭宣教本總百王而致治丕變人文方啟迪於素風思丕揚於鴻烈先聖文宣王道膺上聖體自生知以天縱之多能實人倫之先覺元功侔乎簡易景鑠配乎貞明惟列辟以尊崇爲億載之師表朕以寡昧欽承命曆曷嘗不遵守彝訓保乂中區屬以祇若元符告成喬嶽觀風廣魯之地飭駕數仞之牆躬詣遠祠緬懷遐躅仰明靈之如在肅奠獻以惟寅是用稽簡冊之文昭聰叡之德聿舉追崇之禮庶申嚴奉之心備物典章垂之不朽誕告多士昭示朕意宜追諡曰元聖文宣王 按曲阜縣誌大中祥符

元年封聖考叔梁紇爲齊國公聖母顏氏爲魯國太夫人制曰朕以祇陟岱宗新巡魯甸永懷先聖之德躬造闕里之庭奠獻周旋欽崇備至唯降靈之所自亦錫美之有初像設具存名稱斯闕宜加追命以煥典章叔梁紇宜追封齊國公顏氏宜追封魯國太夫人遣部官員外郎王勵精虔祭告追

封聖配元官氏爲鄆國夫人制曰朕巡行魯郡躬詣孔堂顧風教之所尊舉典章而既渥眷惟令淑作合聖靈載稽簡冊之文尙闕追崇之數屬茲咸秩特示追崇垂厥方來式昭遺範元官氏宜追封鄆國夫人仍令兗州遣官詣曲阜祭告

大中祥符二年追封先賢及先儒爲公侯伯 按宋史真宗本紀大中祥符二年二月壬辰詔立曲阜縣孔子廟學舍五月乙卯追封孔子弟子七十二人秋七月戊寅詔孔子廟配享魯史左丘明等

十九人加封爵 按禮志大中祥符二年五月乙卯詔追封十哲爲公七十二弟子爲侯先儒爲伯或贈官親製元聖文宣王贊命宰相等撰顏子以下贊留親奠祭器於廟中從官立石刻名 按

玉海大中祥符二年三月庚辰詔文宣廟木主易以玉賜桓圭一五月乙卯朔詔追封顏回兗國公至卜商河東公會參瑕丘侯至琴張頓丘侯詔曰四科鉅賢並超五等七十達者俱贈列侯令中書門下及兩制館閣分撰贊命王旦撰顏子贊初帝覽崇文院檢定七十二弟子案史記唐會要凡七十七人今曲阜廟唯七十二人帝曰何故不同王旦言國學七十二弟子經太祖定議曲阜準國學畫像七月戊寅詔封左丘明至范寧二十一人皆爲伯贈王肅司空杜預司徒命羣臣爲贊 按

曲阜縣志大中祥符二年追封顏子爲兗國公詔曰朕乃封巒禪社昭列聖之鴻勳崇德報功廣百王之彝制言旋於闕里遂躬謁於魯堂瞻河海之姿睟容穆若出洙泗之上高風凜然舉茂典之有加期斯文之益振由是推恩世胄併錫寵章增其奉邑念性與天道德冠生民議茲元聖之名冀廣嚴師之禮兼朕親製以表崇儒至於四科鉅賢並超五等七十達者俱贈列侯仍命寮案分紀遺烈式書褒揚之旨庶幾善誘之方宜令中書樞密院三司兩制承郎待制館閣直館校理分撰贊以聞

大中祥符三年孫奭請上丁備差太尉太常光祿卿以充三獻又命頒釋奠儀注及祭器於諸路

按宋史眞宗本紀大中祥符三年六月丙辰頒天下釋奠先聖廟儀并祭器圖 按禮志大中祥符三年判國子監孫奭言上丁釋奠舊禮以祭酒司業博士充三獻官新禮以三公行事近歲止命獻官兩員臨時通攝未副崇祀向學之意望自今備差太尉太常光祿卿以充三獻又命崇文院刊釋奠儀注及祭器圖頒之諸路

大中祥符四年五月癸巳詔州城置孔子廟 按宋史眞宗本紀云云

大中祥符五年改諡孔子爲至聖文宣王並定州縣釋奠器數 按宋史眞宗本紀大中祥符五年

十二月壬申改諡元聖文宣王曰至聖文宣王 按禮志以國諱改諡至聖文宣王賜孔氏錢帛錄親屬五人並賜出身又賜太宗御製御書一百五十卷銀器八百兩詔太常禮院定州縣釋奠器數先聖先師每坐酒尊一簋豆八簋二簋二俎三爵一洗一篚一尊皆加勺罍各置於坵巾共二燭二爵共四坵有從祀之處諸坐各簋二豆二簋一簋一俎一燭一爵一

大中祥符七年王旦言請用先天節禮畢詣文宣王廟行禮 按宋史真宗本紀不載 按闕里誌云云

天禧二年賜文宣公祭服修葺廟宇 按宋史真宗本紀不載 按闕里誌天禧二年賜文宣公家祭冕服又賜行宮材修葺廟宇又敕兗州差兵士四十人員察一人於本廟巡宿守護官物仍委轉運司於轄下有衣甲軍器處約度支與本廟

仁宗天聖二年八月己卯幸國子監謁孔子 按宋史仁宗本紀云云 按闕里誌仁宗初卽位首隆儒術車駕幸國子監奠謁先聖退閱七十二賢贊觀東序及禮器

明道元年詔重修七十二賢堂 按宋史仁宗本紀不載 按玉海明道元年八月戊午詔國子監

重修七十二賢堂左丘明而下二十一人並以本品衣冠圖之

景祐元年詔釋奠用登歌 按宋史仁宗本紀不載 按文獻通考云云

慶曆四年幸國子監謁孔子 按宋史仁宗本紀慶曆四年五月壬申幸國子監謁孔子有司言舊

儀止肅揖帝特再拜賜直講孫復五品服 按禮志仁宗再幸國子監謁文宣王廟皆再拜焉

神宗熙寧五年罷貢舉人謁奠 按宋史神宗本紀不載 按禮志熙寧五年國子監言舊例遇貢

舉歲禮部貢院集諸州府所貢第一人謁奠先聖如春秋釋奠儀況春秋自有釋奠禮請罷貢舉人

謁奠 按玉海熙寧五年十二月六日國子監言舊制貢舉歲於十二月下旬謁奠時多未至者

請罷從之

熙寧八年判國子監常秩等請孔廟神像依官品衣服從之 按宋史神宗本紀不載 按文獻通

考熙寧八年判國子監常秩等言本監宣聖神像舊用冕服九旒七十二賢二十一先儒並用朝服

檢會唐開元中尊孔子爲文宣王內出王者袞冕之服以衣之詳此則孔子之冕宜用天子之制十

二旒孔子旣用冕旒則七十二賢二十一先儒各用本爵用冕服今來所修殿屋已成見裝飾塑像

欲乞改正下太常禮院詳定禮院檢會國朝文宣王廟自建隆三年詔廟門準儀制令立戟十六枝用正一品之禮大中祥符二年賜曲阜縣文宣王廟桓圭一從上公之制冕九旒服九章按衣服今王爵之服春秋釋奠則用中祠皆今朝之制也其兗國公顏子等皆以本朝郡國縣封爵緣古今禮制不一難以追用周之冕服宜如舊制依官品衣服今文宣王冕用九旒顏子以下各依郡國縣公侯伯正一品至正四品冠服制度庶合禮令從之

元豐六年詔封孟軻爲鄒國公 按宋史神宗本紀元豐六年冬十月戊子封孟軻爲鄒國公 按禮志判國子監常秩等請立孟軻揚雄像於廟庭仍賜爵號又請追尊孔子以帝號下兩制禮官詳定以爲非是而止京兆府學教授蔣夔請以顏回爲兗國公毋稱先師而祭不讀祝儀物一切降殺而進閔子騫九人亦在祀典禮官以孔子顏子稱號歷代各有據依難輒更改儀物祝獻亦難降殺所請九人已在祀典熙寧祀儀十哲皆爲從祀惟州縣釋奠未載請自今三京及諸州春秋釋奠並準熙寧祀儀詔封孟軻爲鄒國公

元豐七年五月壬戌以孟軻配食文宣王封荀況揚雄韓愈爲伯並從祀 按宋史神宗本紀云云

按禮志晉州州學教授陸長愈請春秋釋奠孟子宜與顏子並配議者以謂凡配享從祀皆孔子同時之人今以孟軻並配非是禮官言唐貞觀以漢伏勝高堂生晉杜預范甯之徒與顏子俱配享至今從祀豈必同時孟子於孔門當在顏子之列至於荀況揚雄韓愈皆發明先聖之道有益學者久未配食誠闕典也請自今春秋釋奠以孟子配食荀況揚雄韓愈並加封爵以世次先後從祀於左丘明二十一賢之間自國子監及天下學廟皆塑鄒國公像冠服同兗國公仍繪荀況等像於從祀荀況左丘明下揚雄劉向下韓愈范甯下冠服各從封爵詔如禮部議荀況封蘭陵伯揚雄封成都伯韓愈封昌黎伯令學士院撰贊文又詔太常寺修四孟釋菜儀

按熙豐日曆晉州奏據雄州防禦推官知秀州崇德縣充晉州州學教授陸長愈狀欲乞今後春秋釋奠竝以兗鄒二公配享如允所請乞卽下禮部定奪次序立式伏乞備聞奏州司所據陸長愈狀聞勅旨尋下太常寺定奪申部今據本寺狀看詳至聖文宣王以先師顏子配享及以次從祀皆其門弟子也孟子知道固當尊禮然與孔子異代難與顏子並行配享之禮所請難議施行申部看詳太常寺所定未得允當古者配享及從祀但取著德立功其道又以相成者不必皆用同時之人如蜡之祭也主先嗇而祭司嗇

先農之配卽以后稷神勾芒爲少昊氏之子祝融爲高辛氏火正今春秋之祭則勾芒配伏羲祝融太庭迎氣之日又爲從祀異代之人得爲配祀明矣唐貞觀二十一年詔伏生與高堂生杜預范甯之徒二十一賢與顏子俱配享孔子廟堂至今猶爲從祀孟子亦於孔聖之門堂在顏子之列至荀況揚雄韓愈皆發明先聖之道有益學者未得配享誠爲闕典伏請自今春秋釋奠以鄒國公孟子配享文宣王設位於兗國公之次所有荀況揚雄韓愈並以世次先後祀於左丘明等二十一賢之間所貴上稱聖朝褒崇儒賢備條祀典之意謹錄奏聞伏候勅旨帖檢會左丘明至范甯二十一人並封伯爵如允所請卽乞荀況揚雄韓愈並加封爵自國子監及天下至聖文宣王廟皆塑鄒國公像其冠服同兗國公仍畫荀況等像於從祀之列荀況在左丘明之下冠服皆從封爵奉聖旨依議哲宗元祐六年幸國子監行釋奠禮 按宋史哲宗本紀元祐六年冬十月庚午朝獻景靈宮還幸國子監 按禮志元祐六年幸太學先詣國子監至聖文宣王殿行釋奠禮一獻再拜 徽宗崇寧 年詔都城建文廟 按宋史徽宗本紀不載 按禮志崇寧初詔古者學必祭先師況都城近郊大闢巖舍聚四方之士多且數千宜建文宣王廟以便薦獻

崇寧三年以王安石配饗詔殿名大成增文宣王冕爲十二旒正從享位次 按宋史徽宗本紀崇寧三年六月癸酉以王安石配饗孔子廟 按禮志詔王安石可配饗孔子廟位於鄒國公之次國子監丞趙子櫟言唐封孔子爲文宣王其廟像內出王者袞冕衣之今乃循五代故制服上公之服七十二子皆周人而衣冠率用漢制非是詔孔子仍舊七十二子易以周之冕服又詔辟雍文宣王殿以大成爲名帝幸國子監謁文宣王殿皆再拜行酌獻禮遣官分奠竟國公而下國子司業蔣靜言先聖與門人通被冕服無別配享從祀之人當從所封之爵服周之服公之袞冕九章侯伯之鷩冕七章衰公服也達於上鄭氏謂公衰無升龍誤矣攷之周官司服所掌則公之冕與王同弁師所掌則公之冕與王異今旣考正配享從祀之服亦宜考正先聖之冕服於是增文宣王冕爲十有二旒 按文獻通考崇寧三年太常寺言國朝祀儀諸壇祠祭正位居中南面配位在正位之東南西面若兩位亦爲一列以北爲上其從祀之位又在其後今國子監顏子孟子配享之位卽與閔子騫等從祀之位同作一列雖坐次少下而在文宣王帳座之後於配食之禮未正請改正顏子而下從享位次爲圖頒示天下從之

崇寧 年頒釋奠服制於州縣 按宋史徽宗本紀不載 按禮志崇寧儀禮局言太學獻官太祝奉禮皆以法服至於郡邑則用常服望命有司降祭服於州縣凡獻官祝禮各服其服以盡事神之儀詔以衣服制度頒使州縣自造焉

大觀元年定貢士入學釋菜之儀 按宋史徽宗本紀不載 按禮志大觀初大司成強淵明言考

之禮經士始入學有釋菜之儀請自今每歲貢士始入辟雍並以元日釋菜於先聖其儀獻官一員以丞或博士分奠官八員以博士正錄大祝一員以正錄應祀官前釋菜一日赴學各宿其次至日

詣文宣王殿常服行禮貢士初入學者陪位於庭其他亦略倣釋奠之儀

按玉海作元年

大觀二年從通仕郎侯孟請繪子思像從祀於左丘明二十四賢之間 按宋史徽宗本紀不載

按禮志云云

大觀四年封公夏首等十人爲侯 按宋史徽宗本紀不載 按禮志議禮局言建隆三年詔國子

監廟門立戟十六用正一品禮大中祥符二年賜曲阜廟桓圭從上公之制又史記弟子傳曰受業身通六藝者七十有七人自顏回至公孫龍三十五人頗有年名及受業見於書傳四十二人姓名

僅存家語曰七十二弟子皆升堂入室者按唐會要七十七人而開元禮止七十二人又復去取不
一本朝議臣斷以七十二子之說取琴張等五人而去公夏首等十人今以家語史記參定公夏首
后處公肩定顏祖鄒單罕父黑秦商原抗樂欬廉潔唐會要開元禮亦互見之皆有伯爵載於祀典
請追贈侯爵使預祭享詔封公夏首鉅平侯后處膠東侯公肩定梁父侯顏祖富陽侯鄒單聊城侯
罕父黑祈鄉侯秦商馮翊侯原抗樂平侯樂欬建成侯廉潔胙城侯

按文獻通考
作大觀四年

政和三年詔以王安石配饗子雱從祀新儀成頒大成殿名於諸學 按宋史徽宗本紀政和三年

春正月癸酉追封王安石爲舒王子雱爲臨川伯配饗於文宣王廟 按禮志政和三年詔封王安

石爲舒王配饗其子雱臨川伯從祀新儀成以孟春元日釋菜仲春仲秋上丁日釋奠以兗國公顏

回鄒國公孟軻舒王王安石配饗殿上瑯琊公閔損東平公冉耕下邳公冉雍臨淄公宰予黎陽公

端木賜並西向彭城公冉求河內公仲由丹陽公言偃河東公卜商武城侯曾參並東向東廡潁川

侯顓孫師以下至城都伯揚雄四十九人並西向西廡長山侯林放以下至臨川伯王雱四十八人

並東向頒辟雍大成殿名於諸路州學